



# QUÆSTIO MEDICA,

Quodlibetariis disputationibus manè discutienda in Scholis  
Medicorum, die Jovis 26. Januarii 1713.

M. JOANNE BAPT. LE BRETHON.

DOCTORE MEDICO,

PRÆSIDE

*An Vita Magnetismus?*

I.

**E**LEMENTUM insiti motus ferè conscium, supremæ signum & digitus Potentiæ, altissimæ arcanum Sapientiæ, corporeus mundi Spiritus, Jovis olim nomine laudatum, nunc Aetheris, non unum Cæli regnum occupat; sed in terras prono fertur vortice, unde novo spiritu allabente fursùm revolvitur. Hinc *Quod est superius esse sicut id quod est inferius* testatur ter magnus Hermes. Innuit his verbis Hippocrates: *Cùm turbata essent principia & in orbem circumvolverentur, multa calidi pars in terrâ conclusa est, alibi major, alibi minor, alibi valde pauca, alibi copia multa.* Suus igitur est Neptuno Jupiter, suus & Plutoni; eoque quo sydera numine radiant, simul perennant Planetæ gyros, hoc ipso liquet mare & æstuat, assiduas ab irriguis fontibus volvunt undas flumina, nec suum deest telluri decus. Hinc profectò *plena jovis omnia.* Hic ubique spirat numen suum, & cunctis indit animam corporibus. Antiquior inde primum terra collegit suam, ut sic Poëta:

*Spiritus intus alit, totamque infusa per artus*

*Mens agitat molem & magno se corpore miscet.*

Nec suo carent spiritu rupes asperæ, saxa inhospita, tellus quos fovet sinu silices, ipsa marmora, nec omne metallorum genus. I ubi ore quæ surgitis cælo stirpes innumeræ, vos promit eadem & educat aura; sic vegetæ, flores fructusque funditis. Talem utique parentem spiritum agnoscitis vasti animantes pelagi, cochlearum & piscium agmina, cetorumque genus. Eodem reptant halitu serpentum species, sæviunt

A

immare: feræ, eunt greges & armenta, sublimem ducunt ærem volucres, namque

*Ignis est cunctis vigor & celestis origo.*

An solus Homo, divini aliqui non expers numinis, nihil ab ortu æthereum tulisset? Iners, pro herclè, jaceret pondus, nec tot tam varios motus nosset edere. Stupendo fabrefactus artificio insitâ ab æthere animâ coaluit, crevit, adolevit. Anima hæc, moribus constans suis, vitæ fons & origo.

II.

**S**UBTILISSIMA ætheris materies, ut mole minima sic virtute maxima, in cuiusque vorticis stellâ centrum habet; orbis solem nostri stellam esse dixeris, vel aliorum stellas totidem soles. Hi circumquaque nitentium, puta aquæ primigeniæ, molecularum pondera, fluminibus radiorum assiduis, insitâ motûs quantitate æquilibrare comparati sunt. Ita sol quisque, orbis sui verus Athlas, profusus inter aquæ cœlestis moleculas spiritibus geniali motu easdem ad circumfluendum determinat: sed concitat eò celerius quò propior eas majori spirituum copiâ superat, remissiusque prout vasto in corpore virtus radiorum magis diffunditur. Ad extremum quippe vorticis amplissimi limbum ut progreditur magis æthereus spiritus, in densiores sensim impingit aquas, & nimium divisus in crescentem circulum copiis fatiscit, tantæ molis impar ultra submovendæ. Sic tandem librant cœlestes aquæ solis impetum, inhihentque ne ad oram vorticis totus disfluat: quin, æmulo jamjam pondere, cassos spiritus reflectunt, qui à subsequentibus in circulum abrepti obliquâ ad fontem suum feruntur viâ. Hâc lege mundi ducuntur vices, ut penset quies motum, ut omnis motus ab æthere, mundi animâ, sit. Inde rerum parens æther audit, nulla quod esset absque motu generatio. Animam nihil motu vacuum tulit, commotum & nihil animæ non index fuit. Tellurem rotat sui moris anima quæ rotandi servat modum; suâ crescunt animâ rupes, quæ famulatur rupium indoli; utique suâ vegetant fossilia, stirpes & belluæ, ipse & Microcosmus Homo. Sic eadem corporum omnium anima in diversis speciebus veluti Protheus deprehenditur. Hæc quippe varias nacta quas agitet moles, variisque ducta meatibus, varias fingere corporum species didicit. Hinc multifarios in animalium, ut exemplo sint, formatione observans motus, multiformem componit tubulorum apparatus, proprios singulis vindicat liquores & usibus promovet suis. Ita sibi firmat anima hospitium, & animali vitam promeretur.

III.

**V**EGETANTEM animam nativi cujusdam caloris humorisque radicis insiti specimen asseriebant veterum plures. Ignotis alii facultatibus animati corporis dividebant imperium, & in physicis quidquam audere veriti occultas qualitates oggeriebant. Vel solo tritu vigere corpus & obire munia quidam è priscis ratus est. Jactat Archæum recentior. Plaudit fermentis alter, & animalium spirituum copias advocat. Ille fibrarum elaterio clamat, Præn. Quid plura? suo quisque

pro ingenii modo, vel ut capit Naturæ leges, veritatem delibat: tot enim, quantumvis discrepent vocibus, sententias aliquod veri momentum referre ne dubites. Calor æthereus intimis viventium medullis vel ab ortu insidet. Is primos machinæ animalis afflavit motus & eisdem producit, balsamicum quem sibi continuo elaborat lambens humorem. Hic tenuatus sensim dissipatur, sensum iustaurandus. Sic vita fluxilis jugiter redimitur; sic nimium dissilabilis ætherea aura moras experitur vegetando corpori pares. Sapiebant fortè altiùs qui facultatibus litabant. Hi de functionum vitæque causis nulli stetisse videantur sententiæ, quod Naturæ leges nimidum arcanas prospexerint, tulerintque ante ignorantiam profiteri quàm iniquæ opinioni fidem facere. Hinc more pyrrhónico rursus locutos & empiricam sectantes praxim à scrutandis Microcosmi phænomenon causis abstinuisse censeas, quod ipsis ad medendum patentium effectuum cognitio satis esse visa sit. Amplissimam ex assiduâ perspiratione, quæ sensum tenuiora fugiunt, effluviis copiam miratus forsân Erasistratus, indefinenterve oscillantium fibrarum & liquorum in vasis currentium motus pervidens, unicè naturam tritui studere voluit. Nec sanè tritus exulat à corpore, caveas licet ipsi plus æquo tribuere. Obscuriori sub Archæi vocabulo animalis æconomix causas naturæ odoravit Helamontius. Nonnihil veri tetigit qui fermenta & spiritus Physiologicæ doctrinæ attulit; Naturæ tamen non penitus calluit modum. Qui fibrarum agnovit elaterem, ut ut in eo sapuerit, nihilominus omnem non retexit Naturæ angulum. Quæ igitur opiniones tam diversas conciliare valeat sententia; quæ tot Scholarum lites dirimere cognitio? Microcosmici *Magnetismi* distincta notio. Subtilior materies, quæ cælo fluxa omnibus terræ poris allabitur, nullis non usque maritatur moleculis, in quibus sibi poros fingit itûs reditûsque vias. Ita cuihbet corpori suus est *Magnetismus*, ætheris nempe jugis effluxus refluxusque, quo quidquid occurrit homogenei (eâdem ætherei morûs determinatione præditum corpus intelligas) trahat in consortium, omne sed heterogeneum aversetur & eliminat. Ita quantum proprio æthere differunt corpora, tantæ eorundem discordiæ; sed quò major sympathia, eò minor ætheris repugnantia. Magnetismi virtus in proxima corpora fortior. Hinc ipsorum, prout densiora & compactiora sunt, integrantes moleculæ strictiùs vinciuntur, quòd sub ipso contactu vis attractrix validissima sit, quæ ferè evanescat si particulæ longiùs à se invicem absint. Sed in uno latere ejusdem particulæ validior erit attractionis vis, quàm in alio. Laxioris itaque texturæ corpus si fuerit, alterius Magnetismi virtute faciliùs edomandum & promptiùs resolvendum permittitur. Ne purum adeo nudumque existimes in sublunaribus Magnetismis ætherem. Cogita subtiles sibi sæpius adjungere salium, sulphurum, aut aquæ particulas, quæ suâ figurâ & crassitie, quanta quanta sit, cum pororum dimensionibus proximè quadrent. Hæc corpuscula, quibus personatur ætherea materies, extra sui magnetis loculos diffusa, si, quæ ipsius dominium amplient, offenderint moleculas, eas veluti sarcinas ad ipsum reportant. His & fortè aliis Magnetismi legibus aspecta-

bilis mundi facies e' uerit. Debent i'fde n animam quæ vegetant omnia. Sic Microcof'us omnes ab illis mutuatur animæ vitæque modos. Hinc vita Magnetifmus.

## I V.

**R**Es ad inftar miraculi fupenda fœtus in utero matris apparitio. Neque enim parentum è confilio aut induftriâ tam concinna partium difpofitio, tam apta, functionum ad neceffarias vices, nervorum vaforumque omnis generis diftributio peti poteft. Proximum illud omnibus & familiare Divinitatis argumentum, eafdem quibus cuneta fecit quæ voluit affiduâ virtute leges tuentis. Generationis myfterium ab omni ævo fcrutati funt qui fapientia profecutores haberi voluerunt. Alii germina cœlo volitare diſtitant, quæ ubi à muliere devorentur, ad ejus ovarium deferantur, virili femine ad evolutionem excitanda. In animalium feminibus alii, oculis armatis, innumeras vermiculorum viventium copias deprehendiſſe rati funt; quibus in uterum projectis, unus, niſi & alter, cæteris pereuntibus ſuperſtes ad ovarium fallopianâ tubâ ductus in aliquod ſeſe ex ovis intromittat, ſub fœtus ſpecie modò proditurus. Sed quorſum tot homuncionum milliades unius ſalutem funeribus ſolverent ſuis? Conſultiùs etiam ſapientem rerum authorem egiſſe perſuaſio eſt, quàm ut ventorum alis animalium ſpecies commiſerit. Acceptor videtur opinio ſingulas cujuſque generis ſpecies, quot jam fuere, quot ſunt eruntque, reipſâ in primò condita ſpeciei ovario ad infinitum minutis diſtinctas partibus exitiſſe. At operæ pretium Deo opifici fuiſſe diſſidas tot corporum formas finxiſſe, quæ niſi vel poſt ſex annorum millia evolverentur, totque occultanda ſæculis germina parvitatibus gradibus ad infinitum variis in tenui germine coaptate, dum, poſitis ſancitisque Magnetifmi legibus, ſuperfluam hanc tam multiplicem induſtriam tantique moliminis providentiam fore noverat. Porro ſimplicior, quique minoris operæ videatur modus, ſapientiſſimi conditoris uſque placitum fuit. Simpliciſſimum licet generationis opus, quæ Magnetifmi legibus fiat, maximâ adhuc ex parte ſapientia divinx arcanum anguſtis adeo hominum mentibus videbitur. De Hominis generatione quæritur: Cogita muliebri ovarium ſuis inſtructum vaſis circa pubertatis annos capere incrementum, ſuccorumque alibilibium tenuiſſimas partes ampliandis ſenſim ſine ſenſu oculis illuc appellere, primum fœtus nutrimentum futuri. Jam in venercis amplexibus, ut ſit cujuſque partis Magnetifmus vegetior, ita præſertim uteri vicinarumque partium. Hinc, ad fœcundationem non imparatâ ſœminâ, exuberantes ab unoquoque corporis angulo ſpirituofæ particule ad genitalia deferuntur: at illæ, in maturioribus ovis à masculini ſeminis halitu præpollente Magnetifmo, alliciuntur ad iſta potentiùs; unde blandâ velat exanimatione membræ mox laxantur & concidunt. Nulla mora, vivificæ particule cientur in ovo diſcordes, uſque dum genialis Magnetifmi, pro mole, figurâ, polorum polorumve ratione diverſi, propriâ determinatione, eo ſitu & ordine componantur, ut contractam ejus unde expreſſi ſunt corporis in effigiem concinnentur, parentiſque machinæ æmulentur mechanicam.

404

Jam quemadmodum in typo potior est fibrarum cordis Magnetismus ; ita spiritus ab illo decidui, quam modo sinxerunt ad consimiles motus cicatriculam, eandem alacrius exercent. Hinc tenuis, quo turgebat illa, liquor exprimitur, qui per appensa vascula quærit viam fluendi, quam sensim nactus multiplicem, divisis alveis omnem præterit, singulas partes rore beans novo. Is brevi arefceret, nisi colligatis ovi humoribus reficeretur : ab his enim ditescit assiduâ scaturigine liquor influens ; sicque ab emensis tot canaliculis, circuitu peracto, uberior corculo rependitur. Delineatâ Magnetismi legibus spe sobolis, uteri claustrum subintrat fœcundum ovum. Hujus & uteri membranæ, fortu simul accrescente, crassescunt & ampliantur, quod in diem roboretur harumce partium Magnetismus, unde sanguinis succique alibilis pensum uberius attrahitur. Excluditur non sine matris labore grandior fœtus, simul & validiori vegetior Magnetismo. Quantum eò succi dissipatur, tantum ab eodem alimoniz reposci suis palat infans vagitibus. Lac ipsi materno ab ubere sugendus est, donec illud nutrimenti genus flammæ vitali minùs sufficere videatur. Labor ille, quo solidiora alimenta in cremorem sublacteam solvuntur, chyloseos & digestionis vocibus nuncupatur. Quoniam hæc naturæ molimine succedat quæris ? in promptu est. Nullâ profectò acidi fermenti corrosione, nullo solidæ molis quassu, vel ossa duriora Papiniano experimento videas citò colliquari, dum ignis particulæ aqueas moleculas, totidem cuneos in ossium porulis impactos, eo cient Magnetismo qui vim attractionis, quâ mutuò densi corporis partes necebebantur, retundat & suo jure defraudet. Papinianæ machinæ non dispar officio ventriculus nullam tritûs vim nisi quæ Magnetismo debeatur, nec aliud ab æthere particulis salivæ naturam æmulantibus armato fermentum ad alimentorum solutionem requirit. Hujus enim virtutis est tale fermentum, ut in pororum solidioris etiam alimenti cuniculos adactum magneticas particularum catenulas facili operâ discriminet & vim soliditatis fere omnem expungat. Quæ pars chyli crassior primæ in ventriculo coctionis laborem effugit, ad gracilis intestini caput effusæ bilis actione à tenuiori secedit, dum hujuscæ chyli particularum coherentia tenacitasque, quâ sese adhuc plusculum attrahebant, affuso bilis menstruo satis dirimitur, ut à liquore minùs æquilibrentur ramenta crassiora, sicque proprio pondere in fœces abeant. Hinc chylus iterum succo Pancreatico dilutus lacteas venas subit ; inde ad commune receptaculum delatus jamjam emittitur thoracicum canalem, atque sanguinis fluento excipitur. Lacteus hic liquor suo dives magnetismo liquidi cruoris ætheri diu reluctatur, & distendendis matrum uberibus, ubi lac audit, par est. Lactæ tamen non sustinet longiores moras, sed in sanguinem domitus facessit. Hujus veluti Magnes Cor, expansionis & contractionis alternis moribus, ipsum ad partes assiduò propellit & excipit redeuntem. Sanguinem quæ componunt moleculæ diverso fruuntur aliæ ab aliis Magnetismo, unde quantulum per motum progressionis vacat, fermentant. Sic proprio sanguis igne depascitur, idemque radiis è vasorum fibris suo æthere oscillantibus, dum præterfluit, interceptis subigitur. Hinc san-



guis secretionum fons uberrimus singulis proprium colis humorem suppeditat. De secretionis artificio quid interrogas? succum humori discernendo alogum à formationis exordio in glandulis extitisse cogites. Is peculiari quem spirat æthere sibi congeneres è sanguinis rivulis moleculas attrahit; quæque diversum sortitæ sunt ætheris impetum, repellit. Sic charta emporetica oleo priùs imbuta oleum sponte, nec aquam percolat; sed aqua si maduerit ante, aquam nec oleum suis meatibus excipiet. Ita renes feri, bilis hepar, nata cola. Eâdem Magnetismi mechanica suam medullam sibi cerebrum comparat: scilicet succum alendis nervorum propaginibus, fibrillisque assiduò reficiendis idoneum. Hic particulis oleoso & urinoso volatilibus è sanguine detritis, seroque puriore conflatus, humidi primigenii voce olim veniebat. Is ubi fibrarum subiit ostiola & illarum vesiculas distendit, inibi morando concipit vividum ætherem, qui calor insitus dicebatur, cujus actione principiorum dissolutionem tandem patitur, atque in perspirationis insensibilis materiem, jugiter renovandus, absumitur. Ecquid de animali spiritu sollicitus es? Hunc sugunt è sanguine in excogitatis cerebri glandulis secerne, mox in commune recepraculum, quod emporium nuncupant, confluere; unde, quâ data porta, nervorum in tubulos ruant, ad quaslibet motûs & sensûs provincias dimissi. Ingeniosum Ædopol commentum! neque enim peculiares in cerebri substantiâ spiritibus colandis, qui secretionum ipsi sunt parentes, dicari glandulas verosimile appareat. Sed, quos pleno decurrant flumine nervorum tubulos, autopsia nullos esse jamjam asserit. Nervi structura, fibrarum textura. Hæ, vesicularum multo insertarum osculo catenulæ. Quid motûs & sensûs causas inquiris? succus in fibrarum vesiculis qui continetur, ipsas suo, quo liquet, æthere dum quatit, ad oscillandum sive resiliendum instigat. Jam si quis accidit ab objecto sensibili in alicujus organi fibrillas impetus, ad hujus modum spontanea divertitur oscillatio, iniquiores enim æther insitus reperit poros, ideoque quò sensum renirirur minùs, nempe ad cerebrum, traducitur vibratio. Sed, quemadmodum ab extremis vesiculis pender ad nervi principium producta, quæ sensum defert, oscillatio; sic à liquore nervo, comprimente meningum particulâ, in fibrillas fortius adacto motûs animalis instinctus oboritur. Hic succi, illic fibrillarum præpoller, qui vibrationem concitat, æther. Sic itaque sensum & motum Magnetismo tribuas.

## V.

**E**TIAM post mortem corpus Magnetismo reviviscere posse quodammodo defunctorum supra tumulos evanida spectra cælo aperto pacatoque sub aëre sæpius noctu visa nonne comprobant? Quid enim hæc opineris stultè credulus ipsas esse demortuorum animas, vel ficto corpore larvarum Dæmones? Quin satiùs judices ab omni, dum corrumpitur, cadaveris parte manantes halitus eo nexu & ordine ab insitis Magnetismi viribus disponi, ut aliquali coherentiâ tennes in auras non ita facilè dissipentur, umbramque, quasi manes, referant? Quidni ergo fieret animalis, in utero fœminæ, formatio? Hæc nihilò Naturæ operosior

quàm plantarum tot fide dignis ab authoribus testata Palingenesis, chymicæ artis sagacitate revelata. Mirum quor edat quasi miracula Magnetismus ! Pol, ab irregulari motu magneticis tenelluli fœtus particulis maternâ imaginatione impresso qualia monstra nata sunt ! Stupenda sympathiæ & antipathiæ nominibus recensita passim ab authoribus phœnomena Magnetismo meliùs accenseas. Hunc adeo suis in operibus observat Natura, ut cum eodem ipsam ididem consonare credideris. Esto, quis intelligit, Magnetismum qui nescit, cur ad aurum fertur hydrargirus, cur Magnes ferrum attrahit, &c ? Diversas causas tenes ? edisere. Amuletorum insuper, venenorum, specificorumque remedium tot retro sæculis compertas & expertas vires enuclea. Incastrum obloqueris ; rixari desine : suum inesse cuilibet corpori Magnetismum fateare, sed in vegetantibus & animalibus præsertim vividum ; nec cuiusque modò partis peculiarem, sed totius etiam corporis universalem agnoscito, qui perspirationis insensibilis voce apud Medicos audit. Hujus materiem penè innumeris partium integrantium Magnetismis spirituales molculæ ab ipsis detrita partibus tantâ copiâ sufficiunt, ut præsentent secretionem omnium longè uberrimam. Hæc perspirationis materies tantulum cum ambiente aëre misceri commoratur & eundem arceret aliquatenus, simulata vorticem, dum æther sincerior ab aëris intercapedinibus expressus per accommodata spiracula corpus intro meat, eâ quantitate quæ particularibus Magnetismis debebatur. Hujus porro Magnetismi non idem est in singulis hominibus modus ; sed alter alteri magis minusve consonat & adblanditur. Inde cur hominem non priùs visum sponte diligas, averferis alium, non absurda fortè ratio. Jam quod sua quemque trahit voluptas aut natus horror abigit, malè arguunt culpantve fata. In causâ est Magnetismus. Quibus hic viget, res jucundas ; quibus ligatur & vincitur, invisas, ingratas exhibet. Hinc par delectatur pari, nec iniqua connubia mutui amor beat. Quia etiam concupitâ venere speratisque voluptatibus, ob adversas magnetis utriusque vires, non raro se frustrari queritur conjugum par insolens, & iniquo datum jugo. Hos spectat nequitiam istud Lyrici,

*Felices ter & amplius*

*Quos irrupta tenet copula, nec malis*

*Divulsus querimoniis*

*Supremâ citius solvet amor die.*

At carptus igne cæco puellam deperis, quæ tui fastidiosa indignantem alterum sequitur ? Ita fit, ita ludit cupido.

*Insignem tenuit fronte Lycoridæ*

*Cyri torret amor, Cyrus in asperam*

*Declinat Pholoën...*

Hei malè, quod te deliniat Magnetismus puellæ quæ minus recreetur tuo, sed pelliciat ad alterum potentiùs. At infidam arguis amicam ? Alterius numquid adulteri Magnetismus illecebras suaviores obrulit.

Sic ferrum ab impari Magnete ad validiorem refugere cernitur. Tanta est in Naturâ Magnetismorum æmulatio ! Quid plura Microcosmici Magnetismi argumenta postulas ? Hunc universalis Magnetismus, (Naturam dicunt) veluti sobolem mater, assiduò fovet & reficit. Hinc tandiu vegetans anima patente cœlo eget, quandiu vitæ satis est. Sed tandiu vita constat, quàm valet diu vegetans anima congenerem ætherem attrahere, nec ab eodem ipsa distrahi.

*Ergo Vita Magnetismus.*

Domini Doctores disputaturi.

<i>M. Raymundus Jacobus</i> <i>Finot.</i>	<i>M. Ludovicus L'Emery,</i> <i>Regiæ Scientiarum Aca-</i> <i>demie Socius, &amp; Chirur-</i> <i>giæ Professor.</i>	<i>M. Philippus Heeguet, Do-</i> <i>ctus.</i>
<i>M. Philippus Bernardus de</i> <i>Bordegarais.</i>	<i>M. Petrus le Tonnelier.</i>	<i>M. Joannes Bapt. Chomel,</i> <i>Regiæ Scientiarum Aca-</i> <i>demie Socius.</i>
<i>M. Jacobus Simon Gilles de</i> <i>la Rivière,</i>	<i>M. Joannes Gaillard.</i>	<i>M. Andreas Creslé.</i>

*A sextâ ad meridiem.*

Proponebat Lutetiæ JOANNES FRANCISCUS  
GIOT, Constantienſis, Baccalaureus Medicus,  
A. R. S. H. M. DCC. XIII.

---